

四庫全書

史部

欽定四庫全書

唐大詔令集卷十三

宋 宋敏求 編

帝王

謚議上

高宗天皇帝謚議

德宗神武孝文皇帝謚議

順宗至德大聖大安孝皇帝謚議

憲宗聖神章武孝皇帝謚議

穆宗睿聖文惠孝皇帝謚議

敬宗睿武昭愍孝皇帝謚議

謚議上

高宗天皇帝謚議

竊聞星迴日薄懸象著明之謂天龍躍鳳翔握鏡乘時  
之謂聖天以不言為德非言無以暢其神聖以無名會  
道佇名然後筌其用營窟槽巢之代猶昧典章如雲類

海之君方崇號謚所以闡揚功美榮鏡古今伏惟大行  
皇帝稟樞電以降靈膺星虹而延睿以大聖而乘聖克  
昌寶歷之基由至德而纂德載廣金圖之運對日之歲  
窮象外之微言弄田之辰盡天下之能事逮入膺儲副  
養德春闈恒侍禁中問安之道斯極長居膝下候色之  
誠逾勵因心隆於愛敬率性感於神明此先聖之孝德  
也洎乎正位旒宸光宅區縣乎俗軫如傷之念負重懷  
若勵之心求瘼恤隱寒扇渴漿追夏禹之焚甲襲殷湯

之解網一物有違則滿堂興慮一夫非獲則推溝寘懷  
此先聖之仁德也無幽不察觀六合於目前無遠不招  
視八紘於掌內循機授政則旁燭於九圍命將出師則  
坐知其萬里此先聖之明德也寅畏上玄肅雍清廟以  
義制事以禮制心提衡均馭朽之危履石同蹈冰之懼  
雖處泰而弗泰固乘休而弗休此先聖之恭德也卑宮  
菲食土簋茅檐身好弋綈之衣手無金玉之玩翬裘必  
燼絺袂可安撤士星而莫施却超影而勿馭此先聖之

廣德也滎河綠錯朗宸鑑而生知溫洛丹青澡璇襟於  
性奧汾水秋風之唱仰天翰而扶輪矯汭叢雲之譌欽  
睿詞而擁篲此先聖之文德也

缺

無遠而不懷以

我伐戎有征而必伏提封所亘招地位於鄒瀛正朔所  
通闢境踰於亥步此先聖之威德也為於無事動於自  
然鳴鑾訪道

闕

拜小童之言修德就閑載感大庭之夢此

先聖之玄德也體至道而調一氣舒卷陰陽運冲和而  
契兩儀發揮風雨將百靈以交際亦萬物而通誠珍瑞

普彰休徵畢應此先聖之神德也以茲九德上則九玄  
顧連陸於後塵掩胥燧而高視若乃子育羣方之惠財  
受貺於玄符封岳沒金之勲復推功於文帝巍巍蕩蕩  
無得而名方異千祥翊聖萬瑞讚德長居北極之尊永  
契南山之壽豈謂十枝墜景遽淪懸晷之輝八柱傾天  
奄落閬陽之構雲輿在御仙路方遙攀號無再奉之期  
摧殞深百年之痛鼎湖弓劒逾增日遠之悲璇寢衣冠  
空愴月遊之感顧以虛菲夙承乾蔭既忝彰明之地常

懷輔佐之誠薦螢燭以助光引鶴露而添海而聖德虛  
受無來不應每聽覽餘暇侍奉誥言論道德則洞啟玄  
樞語忠孝則廣通心極叙軒頊之淳化積若神交述堯  
禹之清風宛成晤對在位三十五載功超七十二君圖  
象所莫傳開闢所不覩罄楚越之竹書善未窮極泉雲  
之才頌德難盡自賢猷厭俗緹律亟移禍變相仍荒梗  
彌切正惟憑几之夕爰及啟欽之際神情湛正顧託殷  
勤痛道貌之既遠懼先旨之無述所以偷延荒息強終



曩倫望霄漢以興推瞻宸筵而永慕今者龜謀既覈蛩  
遂將臨敬上尊號之儀燕叶大名之典謹按自然覆育  
曰天明一合道曰皇無所不包曰大謹狀上議曰天皇  
大帝廟稱高宗

德宗神武孝文皇帝謚議

皇莫大於羲軒帝莫加於唐虞如氏商鎬亦續憲度咸  
紀名謚以揚昭光徵儒臣之議所以本至公也號全德  
之尊所以節一惠也發揮茂曜如揭日月伏惟大行皇

帝文思睿哲天縱神授大明繼聖大孝尊親服道稽古  
洗心藏密巍巍易簡赫赫功造嚴祖宗而上下昭假仁  
億兆而飛躍表靈始者薊寇殘魂戎旌未偃方由雍邱  
出搃虞師刷讎恥而戴君父超維城而位少海元良有  
問厯數誕膺同商宗而心在諒陰泣漢制而禮從權今  
然後諏咨對越端拱而理時丁侵沴益起訛烈宸筭獨  
復雲雷駿奔浹底定鯨燎殲洗反已哀痛大猷彌尊  
阪泉威武止殺吊人之志也邊方朔陸獫狁昆夷超趙

廣悍不敢不率丹穴南裔扶桑東極自古未化占風而  
至鏡照廣及無思不服之德也大本達道是為中和鼓  
而舞之名我至樂變草繁淫以貞神人奉順聖元侯甸  
繼獻九成八佾聖作明述垂衣脫劍訢合猗那之奏也  
觀文化成匠物斫精四始六義勤諧風雅洪音麗制焜  
耀皦繹立言垂訓丹青玄鳥之作也

缺

保全壽天之

門方疏傳賜日之廣利機瘥不聞長養推仁施濟天地  
如保赤子之誠也教由德禮人乃恥格古作訓夏我箴

政刑載弘哀敬用息刀鋸利見大循本愧心之旨也躬  
信厚而偷薄以草體清明而貪饕以懲納匪躬之直無  
毀校防川之謨推輔弼之功有輻輳並進之歎泥金方  
草仙鼎忽成汗漫無從希夷永閱哀同軌之將會仰鴻  
名之可易鋪衍至賸錫乎無窮謹按經義參諸謚法曰  
應物無方之謂神保大定功之謂武尊仁安義之謂孝  
經天緯地之謂文大行皇帝變化無窮樞衡在握神莫  
過焉整旅善師豺狼擾馴武莫威焉承休繼志永錫不

匱孝莫大焉輝焯玉度煥乎黼藻文莫逾焉考墳史而徵德實請上尊謚曰神武孝文皇帝廟號曰德宗

順宗至德大聖大安孝皇帝謚議

臣上稽太古皇帝之建尊謚也咸揭盛德以旌至公備禮於郊即天成命大易名之典也故堯不稱巍巍成功而以傳聖為盛德禹不稱乃錫玄載而以成功為盛德此則五帝三王統天作謚之大範也伏惟大行太上皇天作睿哲生知太和揚九聖之耿光開萬紀之休運雲

行雨施不俟終日廣愛博教克成浹辰澤萬物德大乎  
義軒公天下道高乎堯舜原夫君人之表教於岐疑造  
物之用先乎著龜在物播為善之樂主器流作貞之慶  
視膳有法文之孝撫軍有戡翦之庸毓全德於春闈積  
大望於覆育垂三十載矣三善方齊乎聖敬六氣遽嬰  
乎沉痾德宗皇帝慮繼明之重深唯疾之憂積其不憚  
至於大漸天崩地圻當暝眩之辰流沙漸海有震動之  
懼而大行太上皇明德動天神化無朕上虔九廟下恤

兆人深冀翌日之瘳大慶即端之作於是建冢嫡以發  
大號赦天下以壯皇猷聖作明述周流灌注若乃奄巖  
穴以搜賢才能官則哲之道也黜進獻以藝貢賦籍田  
任土之利也滌疵瑕而復放寬解網泣辜之仁也蠲逋  
責而惠困窮寬大易簡之義也用能垂拱而神人交泰  
玄默而動植寃安巍巍蕩蕩聖德如風烈雷迅不崇朝  
而益乎八紘矣猶以為黎獻之富教未洽陵寢之制度  
未成深圖甘害於恬順力政不憚於增劇既而同軌畢

至萬邦咸寧奉先之孝克終傳聖之義斯舉釋負寶位  
栖神玉清追姑射之高踪樂華胥之妙道大矣哉與天  
地合其德則不為而成與變化合其神則不疾而速聖  
造盤薄玄風汪洋所謂天授非人力也方陋唐虞之異  
族樂文武於同時振耀重光永清四海孰謂初陽變候  
素疾彌留徵秘術而俞扁必臻走羣望而圭璧斯罄何  
翠華之不駐乘白雲而上仙攀號刀劍哀震寰區皇帝  
悼極憂以致養痛大數之不延外遵易月之命內始終



天之酷詞不朽於禮謚旌罔極於受恩敢敷聖德垂鴻  
惇史謹按易曰天地之大德曰生聖人之大寶曰位謚  
法曰寬裕和平曰安敬慎所安曰孝大行太上皇垂運  
統天端拱造物可謂至德感神翊運光明正位可謂大  
聖永圖丕構傳聖保和可謂大安九族安之兆人賴之  
可謂大孝下採華夷之望上合神祇之心請上尊謚曰

至德大聖大安孝皇帝廟曰順宗謹議

元和元年六月

憲宗聖神章武孝皇帝謚議

王者崇高以配天廣大以法地章明以象日月誠信以合四時謂之令王謚以全德所以名盛烈昭至公堯舜禹湯文武成康是也伏惟大行皇帝由疏封以繼明自前星而受命以四海為養以萬乘問安稽古法天自家刑國穆穆俊德煌煌大明煥乎人神塞乎天地國家天寶之季宿兵中原強侯專地往往而有號令不一朝廷包羞元和輝威霆擊篳路藍縷夏剪蜀擒潞殄吳夷蔡取齊朝滄納定光千載之期運平六葉之梗俗動也用軒

轅之干戈靜也戰武王之弓矢聖神之道其至矣乎以  
無方之能行不宰之用濟天下之務施天下之仁夷狄  
之情偽遐裔之虛實揣其變化權其後先屈指前筭若  
合符契多士濟濟任其器畧文武俊傑畢力致用綱目  
張而萬化具斟酌明而百事宜委庶務於廟堂之上壽  
百姓於循良之府開直言之路庶無蔽聽施廣大之恩  
物無違性宥恕刑獄哀惠困窮省薄徭役尊禮老者約  
已恭儉推心平明公卿大夫任德終始近狎貴寵畏忌

守法採納羣正聽斷精慎忠直樹立讒邪不行魏巍成  
功赫赫在上春秋左氏傳曰武有七德禁暴戢兵保大  
定功安人和衆豐財之謂也殲夷姦宄災害訖息禁暴  
也淮河底定大赦疵人戢兵也歸馬於汝南漢南散卒  
於齊梁淮楚保大也封有勞爵有德定功也寬天下之  
蠶絲舉域中之方正安人也救生致之寇虜爵拒命之  
戎將和衆也乘輿服御儉而有制賜與供給惠而中節  
豐財也神武不殺之德其若是焉不登羲軒年不享堯

舜壽百姓思慕如喪考妣同軌畢至相庭有時敢奉官  
常尊名稱德謹按謚法兵禁殘暴曰聖應變無方曰神  
洪度大明曰章為人除害曰武慈惠愛親曰孝戮鯨鯢  
而清四海不曰聖乎裁造作而刑一德不曰神乎洞明  
哲而貞百度不曰章乎推仁義而服萬物不曰武乎載  
尊親而諧五典不曰孝乎書曰惟天聰明惟聖時憲法  
也敏也謹酌之謚法質諸大經謹上尊謚曰聖神章武  
孝皇帝廟號憲宗謹議

穆宗睿聖文惠孝皇帝謚議

臣祐議曰臣聞紹天人之盛美庖犧建其極含昊亨之  
正氣金天侔其稱仁聖或異號謚則殊至於兼包二體  
昭宣一德有自來矣我今因之爰徵克類以騰茂實伏  
惟大行皇帝睿鑒通微神智周物平由藩邸式踐儲闈  
誕膺眷命用建皇極續承丕緒克紹洪勲允釐帝載光  
被王度以易簡凝庶績以仁和壽蒸人明遂事而虛受  
進昌言而不拂清廟嚴薦中壺問安彰愛以誠因心則

著永言恭默思致雍熙敷祐庶氓宗承古訓徵特牲之  
盛禮蘊祈穀之至誠親率公卿祇奉郊祀爰畀大輅俯  
及端門休祥告應非煙在上輪囷五色迴復半空六轡  
時按百辟稱賀迨圓丘展敬天感樂和柴燎告終人神  
胥悅於是雷雨作解惠及萬方布乘春之煦育行惟新  
之頒賜詳延莊彥敷納正辭納宸敬之書用寬大之典  
鮎背是恤繆獄斯平優賚困窮矜蠲逋賦三光增耀羣  
物昭蘇歲蕤汪濊之澤不可得而名也東寇猖狂在浚

為畔有征之日殲厥渠魁此所謂王者之師不戰而克也昆夷恃衆崆峒騁武亟為邊患時漸睿謨煩戎已之戍勞癸庚之脩自我新命咸歸舊封款塞旁午求成修好俯從坎血之懇猥加築館之榮弓矢載索亭障罷警倚成輔弼清一區宇無私之覆既均不宰之功遽化矧乃優遊乎文史之內精窮乎草隸之源崇杖席而選文儒設官司而尊侍從所謂勤求為務聽納居多遵三代之盛猷垂億載之休烈雖疾留聖體而慮發宸衷每



求衣夙興太陽但出沒金是請方事撫謙憑玉俄聞奄  
承末命年異踰於堯舜時忽從於軒昂六龍飛蓋以上  
昇萬姓號天而靡及今因山既卜同軌將臻爰究德威  
式循典禮周書曰睿作聖文前儒闕睿聖也謹按謚法  
曰敬禮祀享施為於人皆曰聖大行皇帝虔恭郊廟軫  
志黎元教尚不嚴化行無朕不為聖歟又慈惠愛人道  
德博聞皆曰文赦三就之刑採百氏之奧仁恕育物寬  
明致理不為文歟又慈仁好與柔質虛受皆曰惠博錫

貧窶哀及鰥寡開延納之路容讜直之言不為惠歟又  
曰秉德不回慈惠愛親皆曰孝文以繼明聖資統御服  
勤不替就養無方不為孝歟考古謚而符德教請上尊  
謚曰睿聖文惠孝皇帝廟號曰穆宗謹議

敬宗睿武昭愍孝皇帝謚議

定尊號考聖烈終古之重事有司宜用大者遠者上具  
百王之明例下開千載之成法參天之意極臣下之誠約  
而舉之以正大謚故稱天以誅大莫加焉微臣得議公

莫至焉所謂大者遠者蓋揔夫一朝之治化四海之惠澤夷夏之率職元元之受賜皇明所臨之遠近睿斷所繫之巨小何如耳其他苟不足以升降臬者固可畧而不論伏惟大行皇帝以英睿之姿紹膺丕厯啟皇輝於磐石浴聖德於少海欽承冊命天下感悅既即尊位孝惠逾顯列聖之道率履無違禮行乎郊裡敬達乎宗廟富四海以致養榮西宮以問安推恩廣愛累霈鴻渥發號施惠洽於百靈而又天姿嚴正睿德沉毅時海內承

憲宗穆宗威靈德澤之後朝野無事生人休息初臨大寶委政宰庭雖當春秋至富而遠蓄剛辯既閱庶務四聰益達英斷自己任賢不疑故卒能光啟承明載安天下橫議或熾聖衷逾堅忠勲內外叶贊雄畧於是舉兵食之大計示經營乎四方而不康之藩首自夷獮勵忠奮節待帥於朝祇承風化遐邇聳動夫不怒而威不戰而勝王者之武也推是大指引而伸之則未形之用可見矣惜乎道未光乎天地澤未浸乎四海而變生非慮

遐邇號天於戲生靈之憤其可既乎七月將至同軌既  
集臣謹上稽國典傍考物情約以經義合諸謚法表功  
節惠庶叶大中書曰睿作聖夫以睿哲之材經聖明之  
業而祖宗成式脩舉罔墜禮百神而親九族尊儒術而  
容諫諍鋪鴻闡號德用章明非睿而何謚法威強睿德  
曰武制勝朝堂之上而稜威遠馭不俟車甲非武而何  
昔漢昭帝之所以為昭知臣而已謚法亦曰明德有功  
曰昭大行皇帝雖謙讓然終任其剛斷以顯明德非昭

而何夫愍者臣下迫悅惋之誠所深切者也謚法在國  
逢難曰愍聖朝既討讎戡亂明告四方有司所宜率億  
兆之心極君親之義薦誠旌感非愍而何謚法慈惠愛  
親叶時肇享皆曰孝孚愛敬於率土刑家邦之孝理躬  
親嚴配之典奔走職來之助廣慈至德非孝而何傳曰  
臨之以莊則敬又記曰莊敬則嚴威擬盛烈之形容叅  
歷古之訓典謹上尊謚曰睿武昭愍孝皇帝廟號敬宗

唐大詔令集卷十三

唐大詔令集卷十四之卷二十四並闕文





欽定四庫全書

唐大詔令集卷二十五

宋 宋敏求 編

妃嬪

冊楊恭道女為婕妤文

冊崔弘道女為才人文

冊蕭鏗女為美人文

冊蕭鏘女為美人文

起復上官氏婕妤制

皇帝良姊董氏等貴妃誥

睿宗皇妃豆盧氏等食實封制

趙國夫人一品制

冊元妃某氏弟為貴妃文

良姊楊氏等為貴妃詔

冊獨孤穎女為貴妃文

許氏等才人制

鄭氏才人制

贈妳婆元氏潁川郡太夫人制

婕妤王氏為淑妃劉氏為賢妃制

吳氏等昭儀制

王氏才人制

冊楊恭道女為婕妤文

維貞觀某年月日皇帝遣使某官某持節冊命曰於戲  
惟爾前魏王府諮議叅軍楊恭道第三女門襲鍾鼎訓

彰禮則幽閑表質柔順為心備職後庭實為通典是用  
命爾為嬪好往欽哉其光膺徽命可不慎與

冊崔弘道女為才人文

維貞觀某年月日皇帝使某官某副使某官某持節冊  
命曰於戲惟爾兼徐州都督府司馬崔弘道長女門稱  
著姓訓有義方婉順為質柔明表行宜升後庭備茲內  
職是用命爾為才人往欽哉其光膺徽命可不慎與

冊蕭銍女為美人文

維貞觀年月日

云云

於戲惟蕭鏐第二女幼習禮訓夙

表幽閑曾出彤族譽聞華閭宜遵舊章授以內職是用  
命爾為美人往欽哉其光膺徽命可不慎與

冊蕭鏐女為美人文

維貞觀年月日

云云

於戲惟蕭鏐第二女稟訓冠族著

美家聲習禮流譽鏡圖有則宜升後庭允茲令典是用  
命爾為美人往欽哉其光膺徽命可不慎與

起復上官氏為婕妤制

門下易著鳴謙禮稱辭貴所以宗讓而退滿推心自得  
其道彌光前昭容上官氏相門積善儒宗雅訓文學冠  
時柔嘉順則內守恬淡外防奢侈發於少長持以周旋  
樂無靡嫚衣必澣濯珠璣不珍墳籍為寶故能誠切一  
室功宣兩朝讜議日間屢援楚筆忠規歲納方輶漢輦  
惟此邦媛鬱為宮師遂能德綜十倫孝高百行頃惟創  
巨爰命權奪秩茂左嬪思被光寵志齊班女懇陳撫挹  
而賢明之業經濟之才素風逾邁清輝益遠不成厥美

將蔽斯言今依表奏以憲圖史可起復媿好主者施行

景龍二年十一月二十九日

皇帝良娣董氏等貴妃誥

關雎之化始於國風貫魚之序著於大易用能輔助王道叶宣陰教皇帝良娣董氏良娣楊氏良媛武氏等門襲鍾鼎訓彰禮則器識柔順質性幽閑美譽光於六宮令範成於四教宜升徽號穆茲朝典董氏可貴妃楊氏可淑妃武氏可賢妃

延和元年十月



睿宗貴妃盧氏等食實封制

有德者位崇有功者秩厚事本闕於國體理無隔於邦  
媛故周母有亂臣之名漢嬪有比侯之爵睿宗貴妃豆  
盧氏賢妃王氏性質陰禮實毗內政訓行九御譽滿六  
宮歲祀雖淹徽音未昧宜啟非常之命特賜湯沐之邑  
可各食實封二百戶

趙國夫人一品制

門下問君以禮乃受齊封免主於厄方延漢渥賢妃啟

邑薦古

闕

時趙國夫人義範端肅操履堅正四德聿修

六宮攸仰承恩蘭掖累變葭灰送往事居備盡忠勤之  
節利人益國每陳匡贊之規頃屬二豎構虎九重起亂  
將危宗社謀害聖躬屬中逐鳥之誠克勵鷹鷂之志方  
効節於松竹宜寵錫於苴茅可一品

冊元妃某氏弟為貴妃文

維年月日皇帝若曰易著六位正天下者先齊於家詩  
本二南厚人倫者理成於國垂芒耀於帝極符紀縉乎

河圖黼黻莊齊祇奉織紵膺是典冊宜歸淑明咨爾元  
妃某氏濬源洪宗靈派茂緒植性懿哲稟姿端柔竭奉  
兩宮總理衆御弘古以行已逮下以率人循師傳之嚴  
躬勤儉之訓色不恃貴言無矜驕和以能容遜以自牧  
致茲蘭馥洽於椒房是宜守四星以居元冠三妃以推  
應今遣使某官某副使某持節冊命為貴妃爾惟公乃  
視聽底於聰明聽靡有偏視靡有惑言違而志必觀其  
誠匡順而心必觀其佞婦順之化資汝而彰陰教之端

資汝而正敬之戒之無替成命可不慎與

良姊楊氏等為貴妃詔

詔曰六位時成方祗所以載物四始爰著膠木於焉逮  
下故能風化聿定肅雍昭被皇后虔恭粢盛儀刑邦國  
詠螽斯而闡業閱闕睢而蹈禮邁樊姬而進善踰鄧后  
之推賢去歲及茲累陳表疏以為內職未備有虧前代  
之禮朕祗奉天命君臨庶邦居紫宸之重若馭朽以秋  
駕處黃屋之尊猶履冰於春旭志崇簡約性靡徵求絕

良家之選曠後庭之例寧惟矯正百王亦將垂鏡千祀  
皇后所陳甚切理在難辭式順徽音敬依來請良姊楊  
氏良姊于氏並家承鍾鼎心標婉淑夙侍儲闈從升天  
禁久淹歲月先著恭勤咸擬職上台分榮中壺揚可貴  
妃于可淑妃于可德妃良媛陳為昭儀良媛閭為克儀  
良媛陸為克容崔氏為修儀

冊獨孤頴長女為貴妃文

維大歷三年歲次戊申月日皇帝遣使某官某冊命曰

於戲位亞長秋坐論婦道聽天下之內治序人倫之大  
端御于家邦式是風化惟爾贈禮部尚書獨孤頴長女  
祥會鼎族行高邦媛體仁則厚履禮惟純有冲敏之識  
不資姆訓有淑慎之行自成嬪則蘊此貞懿灼其芳華  
選躬之初奉承先命肅恭之儀克稱尊旨鑒興北幸侍  
從勤誠祇事壽宮備申哀敬能盡其節實同我心久奉  
椒塗載揚惠問勤於道藝每鑒圖書動有箴規必脫簪  
珥進賢才以輔佐知臣下之勤勞謙讓益勤記功惟最

聲流彤管道洽紫庭克副宮教載修壺職眷求賢淑用  
峻等威百辟抗辭六宮歸美宜崇禮冊俾舉彝章是用  
冊曰貴妃往欽哉無或居上而驕無或處貴而逸降情  
以逮下誠事以防微潔其藻盛服其澣濯敬循禮節以  
率嬪御膺茲嘉命可不慎與

許氏等為美人制

勅許氏尹氏段氏等素稱柔順式稟惠和頗嫻閨壺之  
儀早備組紃之訓服勤有素寵秩宜優是嘉內範之良

並命中宮之職許氏可美人尹氏段氏可才人

鄭氏為才人制

勅古者天子設六宮以詔內理是以闕雎樂得淑女憂  
在進賢將聽雞鳴之詩豈惟魚貫之序鄭氏山東令族  
海內良家每師班女之文嘗慕樊姬之德桃姿焜耀蘭  
行馨香爰用擇才冀無傷善勉當選進之重無忘平和  
之心可才人

贈妳婆元氏潁川郡太夫人制



古者緣情立禮著慈母之制蓋聖人示德無不報之義而漢宣帝亦追錄掖庭羣侍嘗有阿保之勤以功深淺並授封賞記於前典歷代是之故妳婆元氏朕在襁褓賴其撫育推燥就濕慈愛特深可謂仁人厚惠茂德者矣可贈潁川郡太夫人

大歷八年六月

婕妤王氏等為淑妃制

門下禮重內朝國有彝制德既備於宮壺位宜峻其等威婕妤王氏劉氏並體坤順之德循姆師之訓齊莊之

禮淑慎有儀揚懿軌於中閨表柔明於內則惠流宸禁  
芳霑椒塗慕辭輦之智弘逮下之德宜極寵數以彰徽  
猷必能重正閭儀助修陰教無愧於女史之誠國風之  
詩王氏可淑妃劉氏可賢妃仍並令所司擇日備禮冊  
命主者施行

開成五年二月二十一日

吳氏等封昭儀制

吳氏可封昭儀張氏可封婕妤晁氏梁氏並可封美人  
羅氏史氏並可封才人錢氏可封長城郡夫人曹氏可

封武威郡夫人勅位亞長秋毗於內理必資懿範方被  
寵章吳氏等佩服禮經周旋法度有柔婉之行既表於  
天資有恭儉之儀可施於嬪則慕班氏之辭輦偉馮媛  
之當熊思在進賢義高前史是用列於紫殿冠彼後宮  
俾洽彤管之榮式俟金環之慶可依前件

會昌六年五月二十三日

王氏為才人制

勅王氏性稟惠和行推柔順自備宮闈之選頗彰令淑  
之才組紉獻繭館之功圖史服椒庭之訓既嘉懿範爰

錫寵章宜修九御之教以正三星之位可才人

唐大詔令集卷二十五

欽定四庫全書

唐大詔令集卷二十六

宋 宋敏求 編

追謚

皇太子謚孝敬皇帝詔

寧王謚讓皇帝詔

端德太子謚奉天皇帝詔

齊王謚承天皇帝制

冊謚文

冊謚孝敬皇帝文

冊謚殤皇帝文

冊謚讓皇帝文

冊謚恭皇后文

冊謚承天皇帝文

哀冊文

孝敬皇帝哀冊文

哀皇后哀冊文

讓皇帝哀冊文

恭皇后哀冊文

奉天皇帝哀冊文

承天皇帝哀冊文

承天皇后哀冊文

追謚

皇太子謚孝敬皇帝詔



朕肅承鴻緒無忘馭朽之懷虔奉聖謨每切臨深之懼  
幸穹昊垂祐宗社降靈公卿盡協贊之謨黎庶遂懷生  
之望故得乾坤交泰日月休徵垂衣而晏九瀛端拱而  
家六合方將迴鑾岫岫體高尚於軒皇脫屣汾川追逸  
軌於伊后成功勿處思遵象帝之規守器斯傳用申知  
子之授皇太子弘生知誕質惟幾毓性肅敬著於三朝  
仁孝聞於四海若使負荷宗廟寧濟邦家必能永保昌  
圖克延景厯豈謂遽嬰霧露遂至彌留顧惟輝掌之珍

特切鍾心之念庶其痊復以禪鴻名及賸理微和將遜  
於位而弘天資仁厚孝心純確既承朕命掩歎不言因  
茲感結舊疾增甚億兆攸係方崇下武之基五福無臻  
俄遷上賓之駕天性之重追懷哽咽宜申往命加以尊  
名夫謚者行之跡也號者事之表也慈惠親愛曰孝死  
不忘君曰敬可謚為孝敬皇帝仍遵典故式備徽章布  
告遐邇使知朕意

上元二  
年四月

### 寧王謚讓皇帝制

勅能以位讓為吳太伯存則用成其節歿則當表其名  
非常之稱旌德斯在故太尉寧王憲誕含粹靈允膺大  
雅孝悌之至本乎中誠仁和之深非因外獎率由禮度  
雅尚文儒謙以自牧樂於為善比兩獻而有光與二南  
而合德自出臨方鎮入配台階逾勵忠勤益聞周慎實  
謂永為藩屏以輔邦家曾不愍遺奄焉亡歿友于之痛  
震動良深惟王朕之元昆合昇主嗣以朕奉先朝之睿  
畧定社稷之阡危推而不居請予主鬯又承慈旨焉敢

固違不然者則宸極之尊豈歸於薄德茂行若此易名  
是憑自非大號孰副休烈按謚法推功尚德曰讓德性  
寬柔曰讓敬追謚曰讓皇帝宜令所司備禮冊命

開元二十

九年十  
一月

靖德太子謚奉天皇帝制

門下聖人立號天下至公膺其美者必歸有德有其德  
者或無其位苟徽烈可紀則追崇之典行焉况義貫因  
心禮優加等稽夫往策抑有前聞盛業鴻猷久不可替

故靖德太子琮慶鍾霄極親則朕兄性與天通行高時  
望宣慈惠和聰明睿哲四科兼綜一以貫之而福壽不  
遐既隨往運緬惟友愛實軫予心朕昔踐儲宮顧誠非  
次於君父之命所不敢違以少長而言豈忘其序每思  
懇讓竟莫獲從遽順聖慈守茲寶位安可不申夙志有  
闕推恩宜加尊異之名載茂哀榮之典敬用追謚曰奉  
天皇帝妃竇氏曰恭應皇后宜委有司即擇日冊命更  
以禮葬仍令右僕射晁克使監護少府監竇履信為副

主者施行

八年建寅月

齊王謚承天皇帝制

勅藩屏之謚古無鴻名先朝親親則有殊禮自我立制垂萬代法嗣位以長天睠在予崇德報功固當升號況時逢多難首建大冊進昌言以啟聖聰告成命以開皇運易名之儀特異典故齊王侯承天祚之慶保鴻名之光降志尊賢高才好學藝文博洽智畧宏通斷必知來謀皆先事識無不達理至逾精迺者寇盜橫流鑾輿

南幸先聖以宸扆之戀將侍君親惟王以宗廟之重誓  
寧家國克叶朕志載符天時立辨羣議之非同獻五原  
之計中興之盛實藉奇功景命不融早從厚少天倫之  
愛震痛良深流涕追封昨於東海頃加表飾未極哀榮  
夫以叅舊邦再造之勲成天下一家之業而存未竣其  
等歿未尊其稱非所以旌徽烈明至公也朕以眇身纘  
膺大寶不及讓王之禮莫申太弟之嗣所懷靡從追想  
逾切非常之命寵錫攸宜敬用追謚曰承天皇帝與興

信公主故第十四女張氏冥婚謚曰恭順皇后有司准

式即擇日冊命加以禮葬

大歷三年五月七日

冊謚文

冊謚孝敬皇帝文

維上元二年八月五日皇帝若曰於戲咨夫御圖錄者  
至聖荷提衡之業承宗廟者元良膺受命之期渺尋千  
古之外縱觀百王之表成功不處高讓之躅惟崇在賢  
斯授則哲之風逾遠睠彼勲華鼎祚傳於有德洎夫湯



武寶歷歸於孟侯捐前載之宏模成後王之茂範者也  
炎精失馭巨猾挺突普天陷塗炭之危萬姓遭豺狼之  
毒我高祖神堯皇帝應天御物撥亂反正斬白蛇而定  
天下誓蒼兕而會諸侯底綏萬邦又寧六合太宗文武  
聖皇帝循機統極出震開階煉彩石而補乾綱拯橫流  
而恢地絡遠穆近肅時清頌平朕式纘昌基欽承睿緒  
幸憑累聖之福高居兆人之上靈符叶贊天命允集是  
以昭報先功鏤玉於升中之觀聿崇嚴配裡珪於布政

之宮俗阜歲豐化淳刑措幽明以之郊社夷夏由其乂  
安馭朽逾兢寢繩多愧嘗以人之所寶者位雖處位以  
思冲心之所存者道希察道而求逸是以載想褰裳虛  
襟脫屣凝神不滓宣遊汾水之陽滌慮無為訪道襄城  
之野咨爾故皇太子弘克岐克嶷有德有行事親以孝  
愛敬極於寢門奉上以忠恭慎形於馳道孝慈不犯惠  
以及人載隆三善之規無俟八繁之誠發揮絃誦遜業  
之道彌光黼藻溫文承祧之望攸重撫軍監國大闡良

圖百揆萬幾佇令居攝庶幾乾坤交泰主鬯之業方新  
日月重光繼照之明斯遠頃炎象戒節屬爾沈疴實冀  
惟痊釋予重負恩因疾降告以斯懷爾忠懇特深孝情  
天至聞言哽咽感絕移時因此彌留奄然長逝伊川可  
望泣笙駕之無追瑤嶺難躋痛琴風之永絕循環念往  
震悼良深然事欲必行禮雖崇而徒設德惟可尚身已  
謝而宜尊加以尊名允符心許是用謚爾為孝敬皇帝  
式昭典冊俾夫位光一德叶帝載於將來名叅四大播

芳聲於奕禩爾惟明靈若存享茲寶命嗚呼哀哉

冊謚殤皇帝文

維開元二年歲次甲寅八月缺辰朔日皇帝若曰於戲  
咨爾襄王象月降靈自天生派弱不好弄長而勤書衣  
冠待明有清河之畏慎狗馬不玩得淮南之恭儉徃以  
中宗晏駕嗣位登皇制於凶逆是膺虛器懼深禍亂躬  
為掃除推位太皇誠請懇到至公克遂雅懷惟虛宜其受  
茲多福享彼遐齡而腠理俄纏膏肓不救感念親懿用

隱悼於厥心夫避德與能傳聖永祚承萬方之大福在三讓之高節周之太伯王則有焉豈可禮均藩臣名齊列國等昌邑之厭毒同營陽之淪棄者哉是用超於舊典享以榮號遠推仁慈之心特傷短折之壽可謚為殤皇帝仍遣某乙持節授冊宜膺寵靈式慰泉壤嗚呼哀哉

冊謚讓皇帝文

維開元二十九年歲次辛巳十一月戊申朔二十五日

壬申皇帝若曰於戲古者崇德考行猶謙大名飾終追  
遠亦膺徽冊况乃元昆之戚天倫之重豈循恒典者哉  
咨爾故太尉寧王憲純粹秉靈冲和成量孝友之性發  
乎天然仁義之道彰乎日用加以好學不倦樂善有聞  
休問揚於閭平清猷光於魯衛實謂儀刑邦國保乂藩  
維景命不融奄從堯逝興言震慟哀疚纏懷惟王地居  
元子合膺主鬯昔朕上稟先訓克清羣兇遂固守撝謙  
懇讓儲副然則深仁厚德茂行已表於生前壹惠尊名

盛禮寧忘於歿後是用謚王為讓皇帝今遣使尚書左丞裴耀卿副使太常卿韋韜等持節禮冊因心之感備物飾情瞻典策而哀深想棣華而望絕所冀幽宥嘉茲寵榮嗚呼哀哉

冊謚恭皇后文

維開元二十九年歲次辛巳十一月戊申朔二十五日壬申皇帝若曰於戲尊名備禮所以悲友于也因親襲號所以申悼往也讓皇帝故妃元氏門承華烈代襲清

猷柔範夙著徽音允穆自伉儷天人能修壺訓克茂詩  
箴之教載修圖史之文豈謂福善無徵遽先歿逝天倫  
有感追悼兼懷福貴從尊事資飾贈有行梁苑早膺藩  
邸之榮將祔壽原允叶椒房之位是用冊妃為恭皇后  
今遣使尚書左丞相裴耀卿副使韋韜持節禮冊章服  
式陳典章攸備永惟神格嘉是哀榮

冊謚承天皇帝文

常袞

維大歷四年歲次己酉五月甲辰朔十二日乙卯皇帝



遣使某官某乙持節冊命曰於戲稽於古典考於謚法  
戚藩升號禮或闕文爰自先朝特追尊號蓋以長而教  
順豈私親而立制合之殊禮允屬元勲天下至公不可  
廢也爾故齊王某慶稟霄極氣陶元和孝彰純行忠表  
令德學師申穆文友徐陳答東平之詔尤推達禮辨南  
陽之牘可謂知微靜而有謀敏亦能斷往以王室多故  
翠華西巡緬懷家邦首建大義上戴君父詔開中興會  
五原之兵車復四海之疆宇懋此偉烈屈於流運愛深

同氣痛結中腸頃雖褒揚猶未兪允言念經啟之功載  
加飾終之數爰革舊典追崇大名是用冊王曰承天皇  
帝改置園邑從饗清廟贈以黃屋左纛龍旂九旒必備  
王者之儀用極送哀之禮庶榮厚甯有愴於懷嗚呼明  
靈尚服休命

哀冊文

孝敬皇帝哀冊文

薛元超

維上元二年夏四月己亥皇太子弘薨於合璧宮之綺

雲殿年二十四五月戊申詔追號謚為孝敬皇帝八月  
庚寅將遷葬於恭陵有司奏哀冊文曰嗚呼赫矣皇統昭  
哉帝謦光膺寶歷大啟瑤圖昌原緬鏡隤趾不渝欽惟  
妙質誕靈居震若木資芳咸池毓潤韶襟日湛英姿岳  
峻裕玉摛華鋪金協韻肇外作翰爰歸養德衢室成規  
軒庭稟則聖敬斯踐溫文匪忒傍照四方下貞四國虔  
誠問寢鳴謙齒冑洞淹儒城橫披禮囿壁流揚彩環林  
蹇秀飛遁來儀鴻生入授率性謂道收縱自大明踰視

牘文冠題鞭裁山聳仞締席開延絕簡時繹精義咸甄  
豪飛紫露言控矚泉務殷監撫寄深社稷鮑俎不陳龍  
雋在側聰達有裕愉婉兼極瑜珮增輝金華動色乾慈  
衍渥廼眷儲皇惟天下之重器將釋負於巖廊竭因心  
之孝辭受終之禮踏厚載以兢魂跼層穹而擘涕泫旨  
但聞逾懇神鑒曾不留少微告謝大漸無瘳方幼尊師  
之業奄從賓帝之遊嗚呼哀哉大象潛運灰飛緹幕經  
霜竇兮文梓寒高颺起兮仙桂落未戢歸巢之燕空對

栖閣之鶴嗚呼哀哉玉靈獻兆蜃隧合陰拖儀旌之委  
鬱翊羽騎之森沉轆湯渠而迴驚指豪改以遙臨楚挽驚  
而疑斷悲笳咽而復尋蕭索動風雲之氣蒼茫感天地  
之心嗚呼哀哉流日黯以西傾奔川淼而東度地擬橋  
山之曲闕如闕陌之路攀宇宙而無追仰容顏以纏慕  
嗚呼哀哉瀛區有變天柱終飛懷蒼梧而日遠望白雲  
而不歸沉沉隴樹漠漠泉闌竭五音而載筆藹千祀而  
騰徽嗚呼哀哉

哀皇后冊文

宋溫璩

維開元六年歲次戊午五月甲午朔三日丙申哀皇后  
裴氏梓宮啟自先殯將遷祔於恭陵之山塋禮也皇上  
御寰區而翼翼纘洪緒而親親感上仙於周副痛未從  
於虞嬪攀鶴駕於終古贈鑒輅而增新時無遠而推吉  
物有容而必陳纂芳伸思徵幽寄神載揚清懿之烈爰  
屬有司之臣其詞曰月麗雲昇靈叶爽馮邕鄉茂族  
晉邑丕承土厚河廣祥發慶膺公侯必復級冕攸興良

精兌象室家化國昌胄延和榮門誕德淑問不已柔順  
允塞素里揚英清閨仰則一人元良萬邦大本天作之  
合興能烈壺家本樹於漢封地先歸於晉袞主饋旌善  
賀酒騰歡承暉養德奉景訪安搖金羽之頻頻結環珮  
之珊珊賁日月之光色妙靈象而無端於是含章握文  
因此敬微慎獨崇法服於輦組接懿筐於蠶簇覲皇英  
而上親祇霄燭而下睦庶無違於信順期有馮於福靈  
忽虧光於輪月奄落彩於前星爽仁壽於偕老邁天禍

而期丁瞻神宇之惟漢感靈衣之靡形驚迴風於虛殿  
宿衆鳥於空庭顧長御以擘涕甘自殉於山扃制立時  
而遽終情循節而恒苦草驕春而繞砌蟲吟秋而入戶  
限百刻之不延調六脈其誰補嗚呼哀哉徂謝緬其永  
久氣節浸以流換感寔宓之幽偏軫皇情以悽歎稽舊  
章之典禮崇新命之綸煥齊天地而德合綜神靈而道  
貫嗚呼哀哉日吉兮辰良玉珮兮金章命騏校以進駕  
翊龍輶而上驤代靈靴於河鼓建叅旗於太常號宮女



之噉噉遣使臣之皇皇騰魚軒兮背北渚亂鳳管兮越  
南岡當赫曦之畏日如徙靡之秋光望曾城而不返遵  
厚夜而何長嗚呼哀哉神理惟昧萬物同宅人生有終  
駟馬過隙訊虞妃於前古聞嬪帝於在昔感伊洛之山  
川懷靈仙之影迹彼銷形於天壤云誰同兮金石惟彫  
管之芳輝與青史而無斲嗚呼哀哉

讓皇帝哀冊文

徐安貞

維開元二十九年歲次辛巳十一月戊申朔二十四日

辛未寧王薨於西京之邸第旋殯於正寢之西階翌日  
有制冊王為讓皇帝蓋景龍歲先帝即位王嫡長將立  
為皇太子讓大功於我皇洎薨落讓存有追崇之義粵  
若天寶元年夏五月乙巳朔十七日庚申將遷座於惠  
陵禮也龜策先遠龍輜此時嗚呼哀哉皇帝遣金紫光  
祿大夫守尚書左僕射攝太尉上柱國許平縣開國侯  
耀卿奉宵載奠祖筵以申天倫之憾也乃命詞臣序之  
典冊其詞曰昔真人之述作表高節於讓王太伯聞乎有

周皇昆昭於聖唐古往今來身退業昌沒而不朽揚乎  
耿光玄祖錫慶重熙累盛茲冢嗣之謙德迨遺靈而受  
命童孺之辰初至壽春開國方大進封於蔡以委親賢是  
兼中外奄有於宋復遷於寧正疇庸於地理配明德於  
天星或建符節言歸闕廷既睦天愛承歡帝樂東扈溫  
泉西侍平樂風雅屬和論思辨博宸超北上謁紫殿於  
蓬萊夕息南歸對瓊樓於花萼莫匪恩遇周爰咨度坐  
而論道實惟三公登太尉兼儀同拜司徒命司空儀刑

作孚宣和國風稽以前事緬懷逝者五王同日曜大君  
之一龍萬國來朝無梁王之駟馬讓則有之崇名可追  
踰周盟之禮會七月之期太史造時遣奠於茲自藩王  
之邸第建天子之旌旗度春明而春盡下長樂而長辭  
經灞川與渭川慘容衛兮遲遲當苑門之宮觀使吾君  
兮望思嗚呼哀哉高寢林間陰堂晝閒代謝今昔神之  
往還列昭穆兮斯在奉忠孝於橋山嗚呼哀哉

恭皇后哀冊文

維開元二十八年歲次庚辰月朔日寧王妃元氏薨於西京之第旋窆於某塋天未忘也相次徂落其明歲十一月二十四日王薨在殯制冊為讓皇帝且有後命追謚妃為恭皇后蓋以王有讓統之實而妃有恭德之美所以考其行追崇皆聖人天倫篤愛有光於古先者也粵天寶元年五月乙巳朔十七日庚申將遷祔於惠陵王薨及葬凡為七月天子之禮也乃命侍臣叙以冊書其詞曰皇矣有熊處乎玄宮衣冠所在祉膺無窮以武而

興復於上中以文始大元氣比崇禮侔周恪慶漸柔風

展我邦媛倫昭有融至靜委和如天克令莫莫中谷天

天作詠黃纔導容素沙增映鑒圖閱史陰儀壺政帝寵

元昆妃承累命降家人之禮擬陰安之盛

漢書文紀陰安侯高帝

鵲橋行化人倫以正或幾望於終古故守冲而益敬祥

開夢兆服媚蘭蓀女延湯邑男受推恩緣車齊軫彩戟

盈門各稟柔訓常貽話言天授戩穀無非

闕

歸賄事

凶毀臺

闕

團月忽蝕朝雲亦霽綵滅

闕

韶陽收華邸第

嗚呼哀哉魯宮未考津門遽哀帝以讓而追謚后從夫  
而永陪暈揄暫舉璋瓚誰開用小君之備物怨吾王之  
不來嗚呼哀哉娥輪半上唇輅將移追雙旒兮遲遲卷  
六衣兮披披青門一別兮不駐素漈既濟兮相隨入松  
柏顧遠兮參差司馬門兮壘壘恭后墳兮在斯嗚呼哀  
哉

奉天皇帝哀冊文

王縉

維元年建寅月二十六日故靖德太子謚曰奉天皇帝

妃竇氏謚曰恭應皇后啟自細柳將遷座於新豐望黃  
山而入上苑過紫極而出天門傍臨鳳闕雙引龍輜乃  
詔左僕射冕祖饋於行宮禮也今上孝悌通於神明追  
崇徽謚用達皇情陟岡目送避殿涕盈爰命述者以振  
休聲其詞曰昔在高祖文思武德龍戰必勝海飛爭息  
威加八荒奄有萬國累業繼聖惟天是則昌運斯應睿  
哲乃生爰自弱歲有如老成秤象知小測日言輕率  
爾之對畧而不行問安內豎豈獨重明深居邸第亦稱



惟城禮樂不執藝或可遊聯行魯衛虛佇應劉雁鷺非  
好神仙不求為善自樂俾躬處休行成於內聲聞於外  
性實匪驕迹能用晦朝野多歡兄弟高會主客曳裾閒  
園飛蓋仁者當壽天道何昧小山未傾盤石忽碎嗚呼  
哀哉天慈罔極寵命猶新前星告位少海遷神黃公誰  
容音容自春空悲天牒獨有芳塵正位乎內進賢

闕

肅肅令妃幽公之子家自漢室代為戚里百兩比肩四  
教盈耳不藝珩珮能循沼沚傳訓公宮留箴女史旋稱

未亡身誓之死柔質泯焉徽音不已嗚呼哀哉帝念元  
昆人無間言不及讓國於是追尊惟儲出震惟儷居坤  
備陳服御更起陵園來九重兮復去動萬乘兮還靜挽  
淒楚而凝哀駕迤遲而轉影別青門之早春背素澹之  
斜景路已窮於咫尺時不延於俄頃嗚呼哀哉神輝永  
戢軒曜長零窆塋椒闥泉戶彤庭開壽宮兮寂寂虛玉  
座兮冥冥賓上帝於宵眇陪五后之明靈海為田兮岸  
為谷德不朽兮惟馨嗚呼哀哉

承天皇帝哀冊文

常袞

維大歷三年歲在戊申四月丁未朔六日壬子故齊王  
謚曰承天皇帝興信公主季女謚曰恭順皇后初天寶  
十五載會有國難王首建大義扈先帝於朔陞以其年  
八月薨於行在某年某月追封齊王今上親親念切冊  
贈大號以大歷三年六月遷座於咸陽銀幣傳曙金根  
在馭出仙禁兮逶迤泊橫橋兮西去乃詔禮儀使工部  
尚書祖奠於行宮禮也聖慈友愛痛結天倫爰命作冊

授之儒臣其詞曰天祚我唐帝系其昌鴻明皇皇子孫  
保光長發其祥倬生賢王英華外揚五色含章聰敏明  
粹孝友純至文麗春華神清顥氣所全者德不有其貴  
昔在開元錫羨其蓄儲后愛子天皇弄孫勝衣走拜即  
啟東藩山委慶賚雲翔渥恩紫殿丹臺兮相屬臨洞音  
宵兮沉沉聯日元以金友煒芳萼於瑤林甲觀宴兮承  
顏數寢門侍兮鍾愛深既閑詳於占對亦自守於冲退  
忘外事之嬰拂服前言之箴誨謂歡娛之末更何艱否

之相會雲雷邁屯闕洛揚塵乘輿南幸定議北巡上戴  
君父協於天人中興之業實賴經綸如何上玄不假之  
年丹誤金鼎樽空玳筵軫於震慟澤漏重泉東負蒼海  
錫其土田顧謀始之言博謂飾終之恩薄崇章大號自  
我天作錫梁國之旌旗用魯侯之禮樂備物宮庭巍巍  
寵靈寶符玉牒照曜青瑩仙駕帝儀上升紫冥邦媛之  
妹婦道不踰遽辭金屋久門珠襦錫以象服合於鮒隅  
嗚呼哀哉出國門兮蒼山轉辭白日兮長安遠驚飈落

於桂宮零落沾於蘭坂建翠鳳兮歲蕤瞻落烏兮遲遲  
壽宮閉兮與天畢玉塵深兮無曉時嬪嬙儼兮侍新寢  
鳬雁遊兮非故池戢神輝之杳靄結吾君之眷思唯鴻  
勲之不泯渺然終古今同斯

承天皇后哀冊文

楊炎

維大歷三年歲次戊申四月丁未朔六日士子故齊王  
謚曰承天皇帝妃張氏謚曰恭順皇后天寶末賊臣構  
難王從二聖南幸成都自以武功定策禁中扈先帝於

靈武以是年八月薨於行在今上錄功追遠詔謚鴻名  
以大歷三年六月遷座於咸陽禮也雲幡宿懸天鷄切  
響建翠鳳以雙引度蒼龍而長往皇帝慟極天倫齊於  
閒館望桂嶼之蕭颯撫蘭臺之傷斷爰詔近臣遺音是  
纂其詞曰皇圖氛氲麗於天文本支百代睽華千載維  
王斯會其祥則大祖武之烈宗文之配令德純粹溫恭慈愛  
和必有節動而無悔持盈以中明道若昧金玉是式鼓  
鍾於外伊昔慶衍維黃握圖天孫載弄甲觀晨趨善問

居講嚴師服儒瓊林秋實寶藻晴敷皇用錫土苴茅剖  
符大邦之翰滄海之隅遙分朱邸近植青梧愛鍾嘉惠寵  
被宸渥從侍寢門觀風大學禮聞齒譔辨聲樂歷運中  
否鯨災構昏帝從避狄聖有昌言王叶羣議天迴乘輶  
適於磻碭之野進於閭闔之門雲趨河北電掃中原方  
從廟告言守藩垣忽川逝於東海怨夜長於西園嗚呼  
哀哉志操見於素履勲名流於天壤成宗裡之有聖悲  
歡愛之易喪獨精聚而魂遊奉君親以長往展我邦媛



德容可仰魯館而家齊風是長翟拜三月輶歸百兩豈  
鳳吹以有歸而虹銷之無像嗚呼哀哉帝念伊始晬容  
生憂傷桂色之幽蠹望山河之林丘解劍龍而追慟燭  
鴻徽以冥搜駕之輅旗服以冕裘儼千官於天衢將合  
祔而從周嗚呼哀哉笳鼓宵陳河山曉發地缺北兮聲  
遠天空南兮影沒入幽隧之穹林伏盤原之宮闕嗚呼  
哀哉考至公與至性見為子兮為臣臨難不忘其社稷  
感時致思其君親短而非病逝豈同塵惟芳名與盛德

可觀法以求仁嗚呼哀哉

唐大詔令集卷二十六

欽定四庫全書

唐大詔令集卷二十七

宋 宋敏求 編

皇太子

立太子

立秦王為皇太子詔

立中山王為皇太子詔

立晉王為皇太子詔

立代王為皇太子詔

立平王為皇太子詔

立郢王為皇太子詔

立忠王為皇太子詔

立宣王為皇太子詔

立廣陵郡王為皇太子詔

立鄧王為皇太子詔

立遂王為皇太子詔

立景王為皇太子詔

立魯王為皇太子詔

立陳王為皇太子詔

立德王為皇太子詔

立太子

立秦王為皇太子詔

儲貳之重式固宗祧一人元良以貞萬國天冊上將太尉尚書令陝東道大行臺尚書令益州道行臺尚書令

欽定四庫全書

唐大詔令集  
卷二十七

三

雍州牧蒲州都督領十二衛大將軍中書令上柱國秦王其氣質冲遠風猷韶茂宏圖昔著美業日隆孝惟德本周於百行仁惟任重以安萬物王迹初基經營締構戡剪多難征討不庭嘉謀獨舉長筭必尅敷政大邦宣風區輿功高四履道邁二南任總機衡庶績惟允職兼內外彛倫載穆遐邇屬意朝野具瞻宜承鼎業允膺守器可立為皇太子所司具禮以時冊命

武德九年六月

立中山王為皇太子詔

尚書奏議以為少陽作貳元良治本虔奉宗祧式固邦  
家中山王承乾地居嫡長天姿岐嶷仁孝純深業履韶  
茂早聞睿哲幼觀詩禮允茲守器育養春宮朕欽承景  
業嗣膺寶圖憲則前王思隆正緒宜依衆議以答僉望  
可立承乾為皇太子

武德九年十月

### 立晉王為皇太子詔

昔者哲王受圖上聖垂範建儲貳以奉宗廟總監撫以  
寧邦國既議在於至公亦事兼於權道以賢而立則王



季興周以貴而升則明帝定漢詳諸方冊豈不然乎并  
州都督右武侯大將軍晉王治地居茂親才惟明德至  
性仁孝淑質和惠夙著夢日之祥早流樂善之譽好禮  
無倦強學不怠今承華虛位率土繫心疇咨文武咸所  
推戴古人云知子莫若父知臣莫若君朕謂此子實允  
衆望可以則天作貳可以守器承祧永固百世以貞萬

國可立為皇太子所司備禮冊命

貞觀十七  
年四月

立代王為皇太子詔

洊雷揚祉承祧之道爰著重離闡曜守器之方斯存故  
能撫寧軍國永保邦家詳覽瑤圖緬瞻遐冊繼業垂統  
咸率茲典代王弘道居嫡膺天縱英姿器質冲華神鑒  
昭遠恭謙表志仁孝居心夙彰睿哲之風早通詩書之  
業朕以虛薄方啟無疆之祚永傳不朽之基取則前王  
思隆正緒宜升上嗣養德東宮可立為皇太子仍令所  
司擇日備禮冊命

永徽七年正月

立平王為皇太子詔

舜去四凶而功格天地武有七德而戡定黎元故知有大勲者受神明之福仗高義者為七宅之主朕恭臨寶位亭育寰區以萬物之心為心以兆人之命為命惟承繼之道咸以冢嫡居尊而無私之懷必推功業為首然後可保安社稷永奉宗祧第三子平王隆基孝而克忠義而能勇比以朕居藩邸虔守國彝貴戚中人都無引接羣邪害正兇黨實繁利口巧言讒說罔極韋溫延秀朋黨競起晉卿楚客交構其間潛結回邪排擠端善潛

貯兵甲將害朕躬隆基密聞其期先難奮發挺身鞠旅  
衆應如歸呼吸之間兇渠殄滅安七廟於幾墜濟羣生  
於將隕方舜之功過四比武之德逾七靈祇望在昆弟  
樂推一人元良萬邦以定為君副者非此而誰立為皇  
太子有司擇日備儀注册命

唐隆元年六月

立郢王為皇太子詔

樹之后王所以輯寧黎獻承之儲副所以安固宗祧故  
能崇四術之科為萬國之本長幼君臣之序齒胄知歸

溫文恭敬之風羣生攸屬古之制也其在茲乎郢王嗣  
讓聰睿夙成端莊特秀三雍禮樂必也生知五官詞藻  
居然暗合體道為器非假於學問資靈受德自符於神  
解夏絃春誦地義天經立人之道既彰為予之誠益著  
今升平在運中外咸寧將有事於元良固不踰於三善  
宜光近日之敏俾冠前星之耀宜以來年正月四日備  
禮冊為皇太子所司准此

開元二年十  
二月十七日

立忠王為皇太子詔

孫逖

門下太寶曰位實在乎丕承萬邦以貞必建於明兩朕  
嗣守鴻業祇嚴永圖恭惟七鬯之主豈捨人神之望開  
府儀同三司兼單于大都護河北河東行軍元帥朔方  
節度使兼關內度支營田鹽池押諸蕃部落等大使上  
柱國忠王璵天假聰明生知仁孝君親一致孝悌三成  
溫文之德合於古訓敬愛之風聞於天下嘗亦視其所  
以察其所安考言有章詢事皆中知予者父允叶於元  
良以長則順且符於舊典宜膺擇嗣之舉俾受升儲之

命可立為皇太子仍取來月內擇日冊命所司准此

開元

四年十月  
十四日

立宣王為皇太子詔

主器者莫若長子繼明者必建儲貳既已傳重亦以崇  
本則君親之大義帝王之弘範無先於此矣朕以眇身  
纘承丕緒夕惕祇畏惟懷永圖承八葉之耿光居四海  
而稱大則七鬯之主棗盛之重樹元貴嫡有邦之先宣  
王誦生知古訓既賢且長聰敏明博孝順恭友不自滿

假率由憲章慶發高禔兆由甲觀為子之道惟父能知  
審觀其志宜承大統固能總戎監撫載乎鼎寶不絕馳  
道謙敬益崇問安必自於因心立學因知其讓齒昇茲  
上嗣庶貞萬國可立為皇太子宜令所司擇日備禮冊

命

建中元年正月

立廣陵郡王為皇太子詔

鄭絪

萬國之本屬在元良主器之重歸於長子所以固社稷  
正邦統古之制也廣陵郡王淳孝友莊敬慈仁忠恕博



厚以容物寬明而愛人祇服訓辭文皆合雅講求典禮  
學必承師居有令聞動無違德朕獲纘丕緒祇若大猷  
惟懷永圖用建儲貳以承宗廟以奉粢盛爰舉舊章仍  
俾茂典宜冊為皇太子改名純仍令有司擇日備禮冊  
命貞元二十一年二月

立鄧王為皇太子詔

門下朕聞君天下者纘承統業何嘗不樹儲建貳安固  
邦家況長子有主器之義元良貞立國之本上以嚴宗

社之重下以順恒久之宜歷考前載率由斯道鄧王寧  
性與忠敬生知孝友秉寬洪之度體慈愛之心學師訓  
謦詞尚經雅動皆中禮慮不違仁稽以舊章允膺上嗣  
朕獲纘丕緒夙夜虔恭常懼神明未歆政理多闕曠茲  
茂典亟涉歲時今屬方內甫寧品物咸遂覽皇王之制  
詢卿士之謀時瞻大猷莫此為甚是用授之元宅位以  
青宮欽為永圖俾奉休命宜冊為皇太子令有司擇日

備禮冊命主者施行

元和四年四月

立遂王為皇太子詔

門下承廟祧之尊固邦國之本重其緒業貞以元良斯  
今古之通制也乃者春宮曠位已涉歲時裸獻闕主宅  
之儀膠庠虛齒學之道其何以懷寧方夏彰示教源稽  
諸往冊用舉彝典遂王宥孝敬忠肅寬明惠和遵保傳  
之言佩經訓之旨友于兄弟睦于宗親博愛而恕已以  
誠慎行而飭躬以禮載觀所履克慎厥謀宜升儲闡以  
對休命朕祇若成憲惟懷永圖法三王垂統之規紹十

聖重光之烈致嚴裡配俾奉棗盛式昭上嗣之榮庶叶  
明離之吉宜冊為皇太子改名恒仍令有司擇日備禮  
冊命主者施行

元和七年十月

### 立景王為皇太子詔

門下朕聞王者敬承廟祧欽若天命必建元子用寧邦  
家所以光叶繼明嚴當主鬯朕纂承聖緒寅奉丕圖惟  
懷國本之安爰在皇儲之重而青宮久曠望苑未開則  
何以表式元良昭宣鴻業稽於往冊用舉彝章長男景

王湛孝愛恭和忠敬誠懿慈惠特稟寬仁夙彰言通典  
謨動合儀矩睦友宗屬遵承傳道克修令聞日茂佳猷  
宜踐儲闈以承休命君尊父嚴每推乾道聞詩學禮用  
首人倫嘉翼翼於誠心觀蒸蒸於孝敬古稱知子無讓  
前修俾奉棗盛式昭元嗣宜冊為皇太子有司擇日備  
禮冊命主者施行

長慶二年十  
二月七日

立魯王為皇太子詔

禮重承桃義承繼體思崇守器必務建儲王者所以固

大本而貞萬國也魯王允溫仁寬明聰敏孝愛動若至  
性居無放心樂善承顏曠度容衆恭勤詩書之教率由  
忠厚之風懿茲猷徽光我胤嗣朕纂承寶位丕寧永圖  
欽若典章用建儲貳爰俾主宅以率問安統正龍樓之  
榮昭宣甲觀之兆宜膺茂典允屬元良宜冊為皇太子  
宜令所司擇日備禮冊命

太和七年八月

立陳王為皇太子詔

門下古昔哲王之有天下也何嘗不正國本而承天序

建儲貳而主重器朕以寡昧祇荷丕圖虔恭寅畏思固  
洪業慎擇令懿曠於旬時而卿士獻謀龜筮告吉以為  
少陽虛位願舉盛儀列聖垂休俾合予志選賢而立式  
表無私敬宗皇帝第六男陳王成美天假忠孝日新道  
德溫文合雅謙敬保和裕端明之體度尚詩書之訓辭  
言皆中禮行不違仁是以順考舊章欽若成命授之七  
鬯以奉粢盛宜回朱邸之榮俾踐青宮之重可立為皇  
太子宜令所司擇日備禮冊命

開成四年十  
月十四日

立德王為皇太子詔

我國家尚法夏殷遠遵漢魏爰設儲貳式固宗祧既明  
兩而作離在立嫡而惟長矧茲冲眇獲嗣丕基將弘永  
圖宜舉令典德王佑朕之元子孝敬日躋早茂溫文克  
將岐嶷屬者朝廷多故兵革尚興懷柔方務於舞干典  
禮未行於主器而羣臣獻議百辟上言請建元良至於  
三四以奉祖宗之教必在前星係億兆之心宜宗嗣體  
由是考彼史冊詢於著龜厥惟舊章乃建嘉命爾其嚴



奉師傳敬慎威儀必使流慶萬邦垂芳三善稟教諭之  
道作圖牒之祥勿怠令猷克光帝載服我明訓永孚於  
休可冊為皇太子仍改名裕令所司擇日備禮冊命

乾寧

四年  
正月



唐大詔令集卷二十七

# 欽定四庫全書

史部

唐大詔令集卷

二十八至  
三十一

詳校官編修<sub>臣</sub>范來宗

編修<sub>臣</sub>表謙覆勘

總校官編修<sub>臣</sub>倉聖脉

校對官學正<sub>臣</sub>常 循

騰錄監生<sub>臣</sub>甯汝櫨

欽定四庫全書

唐大詔令集卷二十八

宋 宋敏求 編

皇太子

冊文

冊晉王為皇太子

冊代王為皇太子

冊平王為皇太子

冊郢王為皇太子

冊忠王為皇太子

冊成王為皇太子

冊雍王為皇太子

冊廣陵郡王為皇太子

冊鄧王為皇太子

冊遂王為皇太子

冊景王為皇太子

冊魯王為皇太子

冊德王為皇太子

冊文

冊晉王為皇太子文

維貞觀十七年歲次甲辰四月某朔日於戲惟爾并州  
都督右武侯大將軍晉王治忠肅恭懿宣慈惠和仁孝  
出於自然信義備於成德禎祥夙著睿哲日新永言少  
陽七鬯是寄疇咨朝列卿士協從是用命爾為皇太子

往欽哉爾其思王道之艱難遵聖人之炯戒勤修六德  
勉行三善無或舉非法度忘恭儉而好驕奢無或理乖  
彛倫遠忠良而近邪佞非履道無以彰名非任賢無以  
成德爾身為善國家以安爾身為惡天下以殆睦九族  
而禮庶僚懷萬邦而憂遐邇兢兢業業無怠無荒克念  
爾祖宗以寧我社稷可不慎與

冊代王為皇太子文

維永徽七年歲次丁巳正月丙寅朔六日辛未於戲夫

明兩載象道貫三才元良表德業隆千古是以夏啟作  
貳光闡高猷姬誦升儲發揮王道詳求典冊式瞻七宅  
固本垂統允歸正緒惟爾代王弘猗蘭毓祉喬桂凝華  
岐嶷表於天姿符瑞彰於神授器業宏遠風鑒昭朗踐  
嘉義而總深仁捨幼志而標成德爰資玉裕早振金聲  
朕虔奉靈圖肅膺丕業仰惟七廟之重思隆萬葉之慶  
疇咨列辟欽若前修是用命爾為皇太子往欽哉爾其  
祇奉憲章率由軌度盡謙恭於齒胄審方俗於迎郊春

禮冬詩趨庭靡懈三善六德昂志無愆絕驕奢之心納  
忠良之諫播徽猷於外宇申敬奉於中闡允睦周親務  
殷堯族永隆四術式寧萬類無荒無怠保我宗基可不  
慎與

冊平王為皇太子文

維唐隆元年歲次庚戌七月庚申朔二十日己巳皇帝若曰  
天有不命集寶位於朕躬所以奉若天道建茲元嗣其明聽  
朕言咨爾平王隆基幼而聰允長而寬博有夙成之量



焉夫禮以修外樂以修內者是務於文也春夏學干戈  
秋冬學羽籥者是兼於武也繫於百姓聞於天下者是  
由於仁也一日三朝嘗藥侍膳者是資於孝也爾有文  
武仁孝之德以知父子君臣之道朕甚休之間者賊臣  
搆逆窺竊神器則我有唐之祚危若綴旒爾又寧邦家  
忠衛社稷誅其凶惡以之康濟主七毫者非爾而誰是  
用命爾為皇太子古人有言曰爾身克正罔敢不正人  
心罔中惟爾之中昭昭臨下不可不畏慎簡乃僚允迪

端士恭儉惟德遠於儉人則萬邦以貞答揚我四聖之  
鴻烈敬之哉

冊郢王為皇太子文

維開元三年歲次乙卯正月甲申朔四日丁亥皇帝若  
曰於戲書不云乎一人元良萬邦以貞易不云乎黃離  
元吉得中道也將以守監從撫主器承祧執經陳東序  
之容端冕見南郊之禮本支百世宜哉福祿咨爾郢王  
嗣謙忠肅恭懿元良利貞遵在鎬之惠慈稟生譙之祥

應學能知道孝乃因心書及春卿懸推早秀言窮淑譽  
遠愧生知當試象之年備成人之敏九玄贊命百姓與  
能正位少陽欽惟大典是用命爾為皇太子其在靖恭  
爾位聿修厥德詩書禮樂敦說為本父子君臣威儀罔  
忒寢門問豎必視寒暄望遠招賢用資端直使三靈合  
契四海係心延我累聖之業積爾重輝之慶必敬必戒  
無怠無荒往欽哉可不慎與

冊忠王為皇太子文

維開元二十六年歲次戊寅七月戊寅朔二日己卯皇帝若曰於戲受天命者皇王之業大為國本者儲副之位崇所以上承宗祧下固黎獻咨爾開府儀同三司單于大都護河東河北道行軍元帥朔方軍節度大使兼關內度支營田鹽池押諸藩部落等使上柱國忠王璵幼而夙成長有宏量佩服仁義周旋禮樂忠孝極於君親友愛聞於兄弟正以率下謙以持盈識洞於微知周於物通刑政之大體負文武之殊能果於積德樂於為

善凡此數德嘗試皆能然豈矜知子之明諒曰至公之  
義況復仰稽天道俯察人心立長則順天所助也議才  
則賢人之望焉是用命爾為皇太子徃欽哉爾其敬膺  
典策無忘戒慎思創業之多難知守器之為重作貞萬  
國允協重明以揚列祖之耿光永貽多嗣之承式可不  
慎與

冊成王為皇太子文

維乾元元年歲次戊戌十月庚子朔五日甲辰皇帝若

曰於戲自昔聖王咸建儲貳蓋將嗣守神器虔奉宗裡  
是以禮經著元貞之德易象載重明之義朕纂服鴻緒  
丕承前烈爰升七鬯之賢是符當璧之命咨爾太尉成  
王倣道備文武生資睿哲溫文彰於日就孝友稟於天  
成往以兇醜亂華干戈集事是能出陪戎駕入奉廟朝  
克符丹水之師實剪綠林之盜所謂功定社稷義寧君  
親今萬邦以貞三善斯屬宜膺上嗣之典俾踐少陽之  
位是用命爾為皇太子以副朕躬爾其思王業之艱難

遵聖人之炯戒非尊賢無以成德非廣孝無以承親遠  
斥便佞詢謀正直兢兢業業庶保於大猷然後無忝於  
祖宗克寧我邦國往欽哉丕膺景命可不慎與

冊雍王為皇太子文

潘炎

維廣德二年歲次甲辰三月戊辰朔二日己巳皇帝若  
曰昔者哲王必建元子上以奉宗廟下以係生民固本  
乃安立長乃順經明者是稱其兩樂善者不止於三資  
於君父之間運在神明之側稽古承式肆予命汝天下

兵馬元帥尚書令雍王适智崇天錫德茂日新文實志  
經武兼講藝性深於孝尤切於問安識蘊其明更精於  
簡牘奉辭伐叛稟命成師積稔逋誅一戎底定業著於  
內功加於時萬方以貞朕志允定是用命爾為皇太子  
以踐於諸宮往欽哉無以不副忘其恭無以不會易其  
度觀圖書之得失思締構之艱難夙夜惟寅主茲乇毫  
永懷我高祖太宗之丕命可不慎與

冊廣陵郡王為皇太子文



維貞元二十一年歲次乙酉四月庚午朔六日乙亥皇  
帝若曰建儲貳者必歸於上嗣固邦本者允屬於元良  
咨爾元子廣陵郡王某幼挺岐嶷長標洵淑佩詩禮之  
明訓稟忠孝之弘規居常保謙動必循道識達刑政器  
含溫文愛敬奉於君親仁德聞於兆庶神祇龜筮罔不  
協從是用命爾為皇太子於戲惟我列祖之有天下也  
功格於上帝祚流於無窮光纘洪緒逮予十葉虔恭寅  
畏日慎一日付爾以承祧之重勵爾以主鬯之勤以貞

萬國之心以揚三善之德爾其尊師重傅親賢遠佞非  
道勿履非禮勿行對越天地之耿光丕承祖宗之休烈  
可不慎與

冊鄧王為皇太子文

維元和四年歲次己丑十月癸酉朔十八日庚寅皇帝  
若曰於戲昔禹有聖子克承父業故三王代襲以天下  
為家我唐受天明命垂二百年欽惟十聖虔嗣寶曆亦  
罔敢越予丕知傳序相受以及予一人獲奉珪幣事上

帝承宗廟夙夜祇懼不敢荒寧永惟負恩思建儲貳須  
假五載相時一德允屬於爾元子鄧王寧惟爾兩曜分  
輝五行總秀體資上哲性被至仁粵在幼冲挺然岐嶷  
寬厚之量匪由師訓溫文之德稟自生知爰撫藩封式  
崇盤石河間之衆懿決策不窮東海之開明視牘能辨  
陪享宗祀贊獻郊禋展禮克誠執事惟敬勤供子道左  
右朕志旋觀表識宜踐青宮訊於蓍龜靈命不二謀及  
卿士人心協同尚膺乂鬯允事監撫是用命爾為皇太

予往欽哉莫尊匪君爾為之臣莫親匪父爾為之子愛敬誠矣忠孝並焉爾其虛受以下賢齊肅以成德無以崇廣處已無以怠忽臨人繼明四方作貞萬國永言配命可不慎與

冊遂王為皇太子文

維元和七年歲次壬辰十月丙戌朔十七日壬寅皇帝若曰於戲建立儲嗣崇嚴國本所以承祧守器所以繼文統業欽若前訓時惟典常越我祖宗克享天祿奄宅

九有貽慶億齡肆予一人序承丕構纂武烈祖延洪本  
支受無疆惟休亦無疆惟恤負荷斯重祇勤若厲永懷  
嗣訓當副君臨咨爾遂王恒體乾降靈襲聖生德教深  
蘊瑟氣叶吹銅早集大成不屑幼志溫文得於天縱孝  
友因於自然符采昭融器業英遠爰膺錫祉實寄維城  
懿河間之不羣慕東平之最樂自頃離明輟曜震位虛  
宮地德可尊人神攸屬武稽令典載煥徽章是用冊爾  
為皇太子往欽哉有國而家有君而父義兼二極重繫

萬邦何好非賢何惡非佞何行非道何敬非刑居上勿  
驕從諫勿拂懋昭乃德惟懷永圖用陪貳朕躬以對揚  
休命可不慎與

冊景王為皇太子文

維長慶二年歲次壬寅十月丁亥朔二十日丙午皇帝  
若曰於戲惟辟奉天必建儲位率命上嗣以立人極所  
以大一統而貞萬邦也粵我祖宗乃聖乃神繼體垂休  
奄宅四海洎予寡昧祇荷丕緒夙夜兢勵深惟永圖用

稽古命嗣以承無疆之慶咨爾元子景王湛粹哲自天  
溫文在躬夙成厚德勿形幼志爰謀表社克彰孝恭敏  
事居敬日新其度是用命爾為皇太子爾其欽哉主善  
勿懈由禮勿違勉以入德勤以聚業修志罔怠自誠而  
明則可以刑於邦家對於上下用光我烈祖之休命可  
不慎與

冊魯王為皇太子文

維太和七年歲次癸丑八月甲申朔七日庚寅皇帝若

曰欽若天道君臨萬方必崇上嗣以固邦本所以尊守  
器而重承祧也我祖宗受天明命光宅區夏玄光被於  
生靈利澤霑於遐荒逮予寡昧繼續鴻序虔畏寅懼不  
克負荷思崇大典用建元良俾膺主鬯之重式叶奉先  
之慶咨爾元子魯王永惟哲淑聰明溫文粹和風表岐  
嶷生知孝敬洎茅苴分社磐石啟藩蘊東平樂善之心  
慕河間大雅之操天縱宏量日新令猷人神協志著龜  
獻兆是用命爾為皇太子往惟欽哉修已有度敬事無



達居必思義動必率禮講道勵學親師尚賢則可以正  
耀於前星配德於重海以承列祖以奉梁盛恢弘懿圖  
無忝丕命可不慎與

冊德王為皇太子文

薛庭珪

維乾寧四年歲次丁巳三月癸卯朔十七日巳未皇帝  
若曰夫立愛惟明建善則固先王盛躅有國丕圖承祧  
仰鏡於前星守器適當乎長子遐瞻載籍眇覲洪荒雖  
步驟隨時質文異制逮於傳序罔不率循國家高視百

王同符三代平一區宇統和人神垂三百年歷十八葉  
暨朕寡昧祇荷景靈屬天步艱難岱宗牢落蒸人未乂  
舊典爰曠庶尹卿士藩輔元僚思正儲闈式固鴻業咨  
爾長子德王裕象叶肯構明啟少陽溫文在躬睦友成  
性博聞強識無愧於老成學禮讀書庶資乎師訓廼輯  
羣議爰咨舊章是用命爾為皇太子嘻毓問承華重輝  
望苑永貞萬國明照四方入則有師出則有保無怠三  
善往崇四術務親正人誠近邪僻淑慎爾止峻防所岐

勉爾厥猷罔墜丕訓

欽定四庫全書

唐大勅令集  
卷二十八

十三

唐大詔令集卷二十八